

Atorfimmi peqquserlunnerup akiornissaanut Naalagaaffiit Peqatigiit isumaqatigiissutaannut Kalaallit Nunaata ilanngunneqarnissaanik matumalu aalajangiiffisassatut siunnersuutip akuerineqarnerata kingunitsianngua tamatuma sulissutigineqalernissaa aallartinneqaqqullugu Naalakkersuisut peqquneqarnissaannik Inatsisartut aalajangiiffisassaattut siunnersuut

(Inatsisartunut ilaasortaq Pipaluk Lyngø, Inuit Ataqtigiit)

Akissuteqaat

(Naalakkersuisut Siulittaasuat)

Kalaallit Nunaata atorfimmi peqquserlunnerup akiornissaanut Naalagaaffiit Peqatigiit isumaqatigiissutaannut ilanngunnissaa pillugu Inatsisartunut ilaasortaq Pipaluk Lyngø, Inuit Ataqtigiit, aalajangiiffisassatut siunnersuusiortoq Naalakkersuisut sinnerlugit qutsavigerusuppara.

Kalaallit Nunaata qanoq pitsaanerpaamik atorfimmi peqquserlunnerit pinaveersaartissinnaanera, akiorsinnaaneraalu kiisalu pisortat aningaasaataannik saqqumisumik tatiginartumillu aqutsineq qanoq qulakkeerneqarsinnaanissaanut siunnersuut pingaarutilimmik qaqtisivoq. Atorfimmi peqquserlunnerit akiornissaannik, pisortallu ingerlatsinerinut annertuumik tatiginninnissamut tapersiinissamik siunnersuuteqartup anguniagaanut Naalakkersuisut isumaqataapput.

Atorfimmi peqquserlunnissap pinaveersaartinneqarnissaanut, akiornissaanullu ataatsimoorussamik malittarisassat Naalagaaffiit Peqatigiit isumaqatigiissutaata aalajangersarpai, isumaqatigiissulli oqartussatsinnut nutaanik sakkussanik peqquserluutinik qulaajaasussanik imaluunniit pinaveersaartitsisussanik tunisinnigilaq. Kalaallit Nunaat isumaqatigiissummut ilanngutissappat suliniutinik pinaveersaataasunik atuutsilersitsinissaminut, pisortanilu saqquminerup annertusaanissamut Kalaallit Nunaat pisussaaffeqalissaaq. Malittarisassalli taamak ittut pinerluttulerinermi inatsisitsinni aamma ingerlatsinermik inatsisitsinni kiisalu neqeroortitsisarnermut inuussutissarsiutinullu inatsisitsinni ilaareermata malittarisassat atuutereerput. Tamanna pillugu isumaqatigiissummut ilanngunneq takussusiornerussaaq sunniuteqarpallaanngitsoq. e.

Isumaqatigiissummut ilanngunneq Kalaallit Nunaanni qitiusumik ingerlatsivimmut nutaanik nammagassaqalersitsissaaq.. Siunnersuuteqartup nammineerluni oqaatigaa suliassat nutaat ilinniagartuunit suliarineqassammata, aallarniutaasumik suliaqarneq aningaasartuuteqarfiussasoq. Ilanngunnerup inissinnissaanut ilinniagartuup piffissaq tamakkerlugu sulineranik naleqassasoq, ukiunilu tulliuuttuni malunnaatilimmik suliassallu annertunerussasut Naalakkersuisut nalilerpaat. Taamaalilluni Naalagaaffiit Peqatigiit aalajangiinerinut, innersuussutaannullu Namminersorlutik

Oqartussat ataavartumik malinnaassapput, soorluttaaq malittarisassat taamasa Kalaallit Nunaata qanoq naammassineraat ataavartumik nalunaarusiorfigisassallugit.

Naalakkersuisut Naalakkersuisooqatigiinnissamik isumaqatigiissummi ersarissumik oqariartuutigaat, Nunatta Karsiani aningaasat nunami tamarmi atugarissaarnermut, innuttaasunik sullissinermut, inuunermilu atukkanut pitsanngorsaataallutik innuttaasoq qanillugu atorneqarunik pitsaanerummat, qitiusumik allaffeqarfiup pappiararsornera annertusinani annikillissasoq. Ilutigisaanik pingaaruteqarpoq ersarissassallugu atorfimmi peqquserlunnerup akiornissaanut Naalagaaffiit Peqatigiit isumaqatigiissutaannut ilanngunneq peqquserluttoqartaratarsinnaaneranut aarlerinartuerutitsinaviangimmat.

Taassumap malitsigisaanik Naalakkersuisut allannguutissatut siunnersuummik saqqummiussipput, imaattumik:

“Inatsisartut aalajangiiffigisassaattut siunnersuutigineqarpoq Kalaallit Nunaanni inatsisitigut atuutitsineq atorfimmi peqquserlunnerup akiornissaanut Naalagaaffiit Peqatigiit isumaqatigiissutaannut ullumikkut naleqqunnersoq Naalakkersuisunit misissorneqarnissaa”.

Taamatut oqaaseqarlunga aalajangigassatut siunnersuutip oqallisigilluarnissaa partiillu oqariartuutaanik Naalakkersuisut tusarnissamut qilanaarput.